



Inatsisartunut ilaasortat  
Sivert K. Heilmann og Knud Kristiansen  
Atassut

### **§ 37 tunngavigalugu apeqqummut nr. 2011-63 ilisimatusarneq akissut**

Inatsisartut suleriaasianni § 37, immikkoortoq 1 naapertorlugu Naalakkersuisut apeqqummut qujapput. Apeqquq imaappoq:

**Nunatta ilisimatusarfigineqarnerani aningaasarpasuit atorlugit ilisimatuut ilinniartussaminnullu nassarlutik nunatsinniittartut, qanoq Naalakkersuinikkut nunatsinneersuniik ilisimasat piginnarnissaanut qulakkeerinninniarnersut?**

#### **Akissut:**

Naalakkersuisut pissutsit taamaannerannik alartaasigaqarput tamatumalu kingunerisaanik ilisimatuunit Nunatta avataaneersunit ilisimatusarnermi ilisimalikkat tamakku innutaasunut, suliffeqarfinnut aamma oqartussanut, inuiaqatigiit ineriartornerannut iluaqutaasinaasunngortsinniarlugit, arlalinnik iliuuseqarsimapput. Matuma kingorna iliuutsit assigiinngitsut eqqartorneqarput.

Pingaarnertut Namminersorlutik Oqartussat ataanni naalakkersuisoqarfinni assigiinngitsuni suleqatigiinnikkut, siunertamat tamatumunngaannaq ingerlataqartussamik suleqatigiissitamik pilersitsisoqarsimavoq suleqatigiissitallu taassuma, ilisimatusarniarlutik qinnuteqartartut qinnuteqaataasa assigiiaartumik suliarineqartarnissaasat, anguniagassaraa. Manna tikillugu Naalakkersuisoqarfiit akornanni taamatut suleqatigiinneq, qinnuteqaatit susassaqartunut agguanneqartarnerannik, suliarineqartarnerannik tusarniutigineqartariaqartunullu tusarniutigineqartarnerannik kinguneqarsimavoq. Tamatuma saniatigut ilisimatusarsinnaanermik akuerineqartartut, ilisimatusaatit inernerinik soorlu nalunaarusianik imaluunniit allagaqaasiatut saqqummersitanik Kultureqarnermut, Ilinniartitaanermut, Ilisimatusarnermut aamma Ilageeqarnermut naalakkersuisoqarfimmut pinngitsooratik nassiussisarnissaminnik piumaffigineqartarput.

Groenlandica, Nunatta Atuagaateqarfiani immikkoortartaasoq, ilisimatusarneq pillugu atuagaateqarfittut inissisimavoq Ilimmarfimmilu atuagaateqarfiup tamarmiusup ataaniilluni. Tassani suliassat ilagaat pinngitsoorani naqitanik tunniussisusaanerup naammassineqarnissaa. Nunarput nunallu issittut pillugit nalunngisassanik ilisimasassanillu kingulissanut attanneqartussanik katersaqarneq tamatumani pineqarpoq. Ilisimatusarnermi ilisimalikkanik soorlu Zackenbergimi ilisimatusarfimmi ilisimalikkanik, peqqissuseq pillugu misissukkanik sumiiffinnilu assigiinngitsuni isumasiuinerinik aamma katersisoqartarpoq. Kikkulluunniit Groenlandicami katersanik misissuisinnaatitaapput.

11. marts 2011  
Sagsnr. 2011-044291  
Dok. Nr. 583894

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: [kiin@nanoq.gl](mailto:kiin@nanoq.gl)  
[www.nanoq.gl](http://www.nanoq.gl)

Naalakkersuisut misiligutaasumik Nuummi Ilisimatoq-naapiguk-mik taallugu aqqanileriarlutik aqqissuussisarsimapput tamatumanilu Nunatsinniit, Danmark-imiit USA-millu ilisimatuut 18-it naapinneqarsinnaasarsimapput. Taamatut iliusseqartarnerni innuttaasut, suliffeqarfiit aamma allat ilisimatuunik naapitsisinaanissaat ilisimatuullu tamakkua ilisimatusaataannik nalunngisaqarlersinnaanissannut periarfissinneqarsinnaanissaat siunertarineqarpoq tamatumunnga ilanngullugulu ilisimatuut ilisimasaminnik siuarterisinnaanissaat. Taamatut aqqissuussinerit tamanut ammatinneqarput aammalu innuttaasunit suliffeqarfiillu sinniisaannik ornigarneqarluartarsimallutik. Maannakkut nalilerniarneqassaaq taamaaliortarneq ingerlaavartunngortsinneqassanersoq.

Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisoqarfimmit ilisimatusarneq pillugu atuagassiaq INUSSUK saqqummersinneqartarpoq. INUSSUK-mi allaaserineqartartut Nunatsinni ataatsimeersuarnerit pillugit naatsumik allaaserisaasinnaasarput imaluunniit ilisimatuunngorniutitut allaaserisanik naalisaaneruinnaasarput tamanut atuaruminarsakkat. INUSSUK marluinngorlugu tamatigut saqqummersinneqartarpoq tassa kalaallisut aamma qallunaatut/tuluttut.

Tamatuma saniatigut Namminersorlutik Oqartussat Joint Committee tunngavigalugu Nunatta, Danmark-ip USA-llu suleqatigiinnerannut atatillugu Kangerlussuarmi aasakkut atuartitsivimmik pilersitsisimapput, taamaaliornernilu amerikamiut ilisimatuut ilinniarnertuunik kalaallinik, qallunaanik amerikkamiunillu pinngortitaq pillugu ilisimatusaatiminnik, ilinniarnertuunut naleqqussakkanik ilinniartitsissuteqartarput. Taamaaliornermi ilinniarnertuut kalaallit pinngortitaq pillugu atuartitsissutinut nukittorsarneqartarput aamma Danmark-imi USA-milu atassuteqaatitaartortarlutik, tuluttut oqaatsiminnik inerisaasarlutik ilinniagartuutullu naammassinermik kingornagut suna pillugu ilisimatusaatissaminnut soqutiginnilersinneqartarlutik.

Naggataatigut oqaatigineqarsinnaavoq ilisimatusarfiit assigiinngitsut nalinginnaasumik ilisimatusaatiminnik allagaqaasiaminnillu nittartakkaminnut saqqummiussuinissaminnut pikkoriffeqarmata, taamaaliornermilu kikkulluunniit tamakkunani nammineq atugassaminnik qarasaasiaq atorlugu aallersinnaanissaminnut periarfissinneqartarput. Ilanngullugu ilisimatuut, suliatik kalaallinut inuiaqatigiinnut atorneqarsinnaagaangata, suliffeqarfinnut, oqartussanut inunnullu ataatsiakkaanut saaffiginnittarnissaminnut kaammattorneqartarput.

Inussiarnersumik inuulluaqqusillunga

Mimi Karlsen